

T5424/1222(8)

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 25 1939

來會館集

卷之十五
卷之十六
卷之十七

來禽集卷之十五

哈佛大學漢和
圖書館珍藏印

濟南臨邑邢 何子愿甫著

墓誌銘

詔封奉政大夫陝西西安府同知拙齋史公墓誌

銘

按狀公諱袋字雍如其自顏楣則曰拙齋蓋公雅性不
樂儼巧事顏楣固其質云公遷祖秀元末從今左馮翊
乘白馬携稚仲良至占箸樂陵昂津鄉素愛馬謂馬死
埋當傍吾墳人遂稱史馬焉三世為勉四世為宣五世

為翱翔麒麟四丈夫翺以舉人仕海寧令麟豪長者生
 述由歲貢仕■岷府典儀鄉里推為善人配闕孺人公
 父母也公蚤隸諸生籍會年及當婚矣典儀公將之官
 擬用伯子入楚而留公受室周視其田廬公長跼日見
 尚少胡以婚也敢一日去大人前乃扶持入楚無幾典
 儀公無祿公拮据喪事惴惴委諸草野之為鄉人羞比
 繆幕及舍公鰥黑骨立無人形終喪產削踰冠猶未婚
 也外舅鄭公為授室置田差給朝夕藉以事闕孺人務
 竭志物身與鄭宜人時減日實曰吾將以效所未盡于

典儀公者于吾母也公精易專經當席口授長公觀察
 君父子相難鬱為世儒觀察君省試魁其經連第進士
 靡所名經師君每向人直所繇就業父教之也公手纂
 十戒五箴寄君官中大抵皆禔身自下意君服膺無替
 在所著蔗平聲而公亦用君五品貴得受■誥為奉政
 大夫比當邑文廟圯卜日僞功公損金帛緡錢幾于空
 橐日月勞獎以汔于成伯兄以文學祭酒老于鄉公每
 佻儂而弱其側腹臘治具奉觴為娛且勤視啟處莊于
 嚴君相將黃髮墳倡篋和有伯康兄弟之風焉從弟貴

不能爲家矣公衣食有度迨其終身貴遺婦子又須公以活若干歲死爲葬僑爲居未始以疏屬生厭心至遇張氏甥備極恩義自少至長置哺娶婦下至嗣子復啣沫無貳及就外傳束修以上悉公營辦不令其家自名一錢也邑窮老無歸孤孱孀單莫必其命者公輒召至賦之食旦旦以爲恒有女徒睽睽寒創濱危矣公屬僮取火燎之予敗絮衣日兩食無缺獲以不死久之爲僮麗婚任其所如往數歲睽睽女抱子曳夫而前倉皇及公門曰窶人夫婦幸有糞土之息非公不及此噉唾叩

首頭肉墳起公溫慰謝遣之歲噉出粟寓調于貸計數二百許斛恣意所取垂豐收責才視卧石諸以子母言者公笑曰老人往者志無蘊年乘人之敝而家于荒是自爲不誼甚也又觀察君間以俸錢應里中緩急需已而償者難之公謂此王家料入老人藉茲惠養多矣而維棄之是亟奚爲而不可請用馮驩之薛事劑券一昔畀炎矣鄉隣產售我產盡糧存往往而是公曰地縮而糧贏此從來握美罪地轉徙而空糧是累是宜屬新地主卽余不敏敢不專承人曰握美者罪公胡弗治乎公

曰是所從來久姑置之公歲賦率贏倍于他家矣鄉鄰時侵我田疆或暴搔吾瓜盜我梨棗菓實也公佯爲不知也者或以問公公曰勿言凡如此等皆我善鄰也公何得有言老幼強億均傭公家公畧不加擇無論老者任老者之事食壯者之食卽壯者視老者之肄食壯者之食亦不督過曰造父不盡馬力吾敢盡人力乎公之遇宗人也多睦而下悉忘寒暑不直一從弟貴然又斤斤糾宗爲事扑勉不恪以厲餘曹歲時合族燕毛雁序秩然井然觥罍叟巡則又小弛苛禮等比洽驩里中父

老欣欣相告若見三代之隆矣公平生少不好美長不好綠飾迨于封爵依然袒褐練巾非故不御醇綵服觀察君秉憲于淮公跨一羸往視之人曰觀察太公豈少數尺輿而猶是眊夸卑處爲公曰觀察宜數尺輿觀察父惟眊夸羸固當家居不治垣屋出入一犢車曰人車吾不忍也素善詩詩以適情導俗爲主然亦沿襲白香山多自得語中歲逐子秦晉江淮間遇所愜會詠歌殆遍晚築園榭開沼種魚來禽青李蒔藝成列時與朋戚相羊其中于于甚得也其所示觀察君十戒五箴蓋篤

老行之里人至不忍自他于姓相謂為吾翁即加姓謂為史老佛云當塗馮軾過廬禮敬造請邑令長上記用養老尊賢指歲奉粟若干石帛若干束鄉飲酒禮自公乃重此不可稱達尊與哉當其負茲時默然元靖屏去血食日延老衲講西方之業從容待盡絕無他贊次困陶陶永適以及大歸此不可稱考終與哉其所值事勢最難而公當之若不見疇者伺以末戚猶子知之獨深觀察君負蓋世姿誓必為縣官任鉅重方其營田淮鳳間惟萬眾三尺是狗耳大相意不合俄然罷之歸公

不色愠曰白土而金紫何不足汝所乎亡何大相告捐言者交疏直君屈立補故觀察官公不色喜曰寒暑代謝常耳吾老人任運已耳天其不吊觀察君倏爾云亡兩雛孫舞象舞勺文筆方適成毀反手間耳遺書在篋公破涕程督如少壯時且為召邑才士為礪諸資不數年俱成器業差次為受室不以老謝田中事妨兩孫學卒之長用禮記嗣父魁東人次乃兢兢不減驃騎公與觀察君名父名子九原饗茲利寧無交相慰勞哉長孫倫魁之日公從几筵受提書尚其灼灼人間世史氏之

天定矣何必窮滄浪而問之公所著拙叟春秋記藏于家銘曰生世魁儒不售而紆朱則以丈夫子亨衢晚節憂劬匪父而維挈則以丈夫孫名駒閱代區區徑寸于于槐安爲境葛天徒壽考福祿惟公俱

勅贈文林郎章邱縣知縣元城董公暨封太孺人

元配張氏合葬墓誌銘

董公諱增字謂補天字謂蓋出竹瀧劉先生指劉先生故從關中趙浚谷學及登路以文章氣誼高一時字謂公則器公甚若曰君其爲女媧氏鍊石成五文而今彼

蒼蒼者無缺焉公系出廣川已徙藁城當金貞元季于遠祖俊以死事功贈太傅謚忠烈加上柱國壽國公有子九人而文炳者在元以平江南封趙國公贈太尉謚忠獻下及諸弟並焜耀著勛伐沒膺贈謚類如文炳者復三人以是終元之世稱藁城闕閔近代無兩云文炳第八弟趙國公文忠後入明而爲平之孫才興之子名志能者以子芳貴封刑部工曹主事是謂主事祖先是主事公避亂北走爲遵化陳氏贅久之與其內兄某有郤內兄欲得而甘心焉陳安人語泄主事公携家奔通州

舉一子小字通州卽主事公所用封貴芳也者而芳初
以未樂乙酉北平解歷官郎中此蓋主事公徙大名元
城以後事主事公從元城卜郡北四十里盤堤家焉遂
大郎中公郎中公陳安人舉四子叔曰茂爲公會大父
茂舉子三仲曰僕爲公大父而僕以選貢令秦安歷長
清俱有聲舉二子長曰文公父也起家決曹爲省祭官
是謂省祭祖爲人磊落感慨善治生年垂七十其同胞
弟老之謂其多女獨也省祭公大嘗謂而兄錚錚者終
不作若敖氏餒且若謂景迫高春耶行見吾收之桑榆

耳亡何闍夫人卽舉公已而郝夫人復舉仲肅闍夫人
復舉季朗而前老公者弟一夕慙憤卒公生負累質稍
長入塾目輒數行下習爲毛公詩兼通魯齊韓三氏之
故而稱專經文力日勝是時早從先達東岩都諫君過
里中得所爲制舉業而奇之曰此吾家駒日遠千里無
契需者古諺有之老蚌產珠此夜光真可照十餘乘幸
公之不及于溺焉此其于功名閤遠矣而矧于余會省
祭公卒公遂起當戶此去嬰彌亡幾卒然舍吾伊而責
治辦如弗勝何又屢遇試試輒病試已病良已公乃仰

天歎曰此所謂命也錄錄儒生而與造化鬪無不祥大
焉此一弟子員何異匏瓜吾有沙鹿之田可耕耳遂謝
學使者以楚服歸歸曰夫木寓龍不任爲雲或借以行
甫貴似也吾泥蟠而池中者耳而人將寶我以似吾實
耻之頃之羨黨果以大師推擇公公爲強就席學徒蟻
集公爲講說經義一如君家仲舒又如鄭元載病茲邑
千人響赴卽二子復興復亨漸列久次靡不湛淳公居
恒曰兩兒子大者多質小者多文質則四封之騏文則
萬舉之鳳任重致遠翔仞下暉其將奚擇少選兩君同

日入類官公爲色喜又二年公遂寢疾往歲公夢神遺
諭康者三隱隱筆形一爲字四一爲字五一爲字壽屬
當綿悛乃謂兩君曰若憶疇昔隄囁兆乎夫季父四十
云徂吾年始逾知命妖夢是踐厥數唯五焉仲父壽徵
矣聞之薊子訓與數老夫笑摩銅人曰見鑄此以五百
年吾視吾五十猶薊生五百耳且世戕橫生而奉縱生
余心有戚戚若佞伽尸而設爲輪迴必不可知之說余
穎有泚矣語訖而瞑卒之日遠近來哭者如干人公性
恬穆然而界限甚嚴當其授徒時夜一姝者躡庭中公

曰是狐祥也吾亦將斬矣荅曰妾人耳憐吾閨寂故來相從句沐沐句薦藉焉公立叱之姝者怏怏去公亦絕口不欲談踰時則以姝者自與所私語語漸外聞聞者爭訝長者長者云于是里人愈益尊信一切質成若大府之憲而公亦時爲判曲直曲者廩廩如荅者皆直者儼乎華衮之在躬也且孝謹與友愛交至值省祭公爾母夫人喪哀毀備禮出分兩弟獨取瘠下曰吾慕卜式薛包之爲恨家貧不能極意聊以畢吾懷耳至于好爲振業人自少至壯率以爲常卽儋石董董不避質劑平生未始不厭人之意而後已也公所最不喜者滿調董一日署其門曰巧言亂是非利口覆邦家幸同土壤死當相直里中人人循題撫臆曰董公爲我耶相務爲籥輔錠精時時董公在側矣誌曰按狀謂公嗜酒好象戲夫魏文角巾撒勢梁卿善彈格五稱名雖異巧捷一同若夫伯倫託寄于歡伯次道致傾于家釀此又往代通人之高致而輓近士人所不得望其津涯者也章邱君復搯擊于公大故時含歛題湊不及禮太孺人一切具矣而以仕宦去家缺于彌留之一訣號天踊地誠傷之

焉雖然章邨君孝情備矣循吏文苑卓然名世百祀而
下人得稱爲元城董君父若母斯爲不朽卽前兩者奚
憾耶語曰公侯之後必復其始此言而信章邨君以隆
所爲復始而徵諸壽國趙國者漫漫其未艾矣抑微二
國卽公積織成鉅而德後善慶之餘無能不復要諸其
始詎公侯已哉太孺人者同邑處士張公季女也生而
不茹葷血見諸茸毳物輒厭之十五歸公佐公爲勤儉
及公捐館督訶二子薦于平時少嬉則涕泣道爾等卽
不念地上生嫠而不念地下死父耶壬辰復亨舉進士

尋補章邨太孺人以板輿從時時教誡章邨君曰章邨
沃土其無染指爲民父母而刻人厲禁以博名高者非
夫也兒其以廉惠終焉彼夫東海嚴媪是誠明知吾不
欲見有此母也章邨君卒用愛利潔清爲齊魯循良第
一則戢母良箴云比人計便奉太孺人還元城觀已章
邨君聽請復東太孺人以不耐車乘道路苦不果行章
邨君聽而辭曰母幸良食兒不十挾日及邨前矣太孺
人沈瀾曰兒乃少此駒際耶老人政以歲月視朝哺耳
章邨君意資久于格宜量移計省覲旦夕事耳乃不四

月而太孺人逝矣章邛君剗腸慟大悔曰天乎詎意有此銘曰鉅儒苗裔通侯耳孫量才八斗較受五樽鉅爛列星無裨蟲雖睠彼靈巢乃長文鷺載鳴載翥驚世冲天公也不亡含怡九泉樹漆歷年視此重捺頌德承休白馬三老公偕厥內永安其居王言煌煌燭精扶輿

文林郎河南道監察御史廣平益軒姚公墓誌銘

公姚姓三讓名厥字崇謙益軒其所署別號也先世由太原榆社奉■詔北徙太携士遷占末年士遷實惟公

高祖四傳而爲處士儼卽公大人封文林翁封翁天資

樸厚世延爲施予里有義門姚氏稱而公生異發夢于

封翁云夢爲關壯繆與我戰北而痕額已公墮地痕額

宛然也久之借琬乃滅稍長從叔父學穎悟絕倫十歲

嫻爲制舉文駸駸令上又數年爲嘉靖壬戌吳興潘公

以督學試拔置文學弟子第一屢試不再屈指聲振膠

庠間唯時郡人春臺蔡公講明心學而公以後進過見

延接討論尙書悉其奧旨公遂推擇爲大師從者雲集

矣萬歷癸酉舉于鄉連第進士踰年用次得祁門令抵

舍壽二親旋以板輿之邸蓋身率婦子僅飯脫粟而樽

下之奉則極旨其公披誠盡下不樂為鉤棘祁人亦安
 公坦易獷悍化之若苾芻之翹陽光也歛民怙勢將嫁
 絲絹稅于同郡五邑民四邑操挺起矣祁觀釁而動公
 亟論之謂有而令在必不忍而曹代歛民肉且謀能已
 稅乎祁以令故靡所譁釅卒之四邑扞文罔而祁獨按
 堵稅竟以不坐一時上下服公恬鎮足屬大事隱然具
 公輔望矣三載上績父母以下受四 勅如制又二歲
 公及于徵矣值母孺人棄養倉皇扶匱歸邑民攀號如
 喪厥妣枳其車三日不得行已相與醜金建祠勒石紀

事他以常食位祀公者千家矣癸未服闋拜山東道監
 察御史乙酉出按三河離周視鰲池劑量池勢高下亢
 潦別為塍畦翻車渴鳥以時轉運不令亢乾潦淖莫可
 孰誰猶夫土炭低昂屬諸造化而以吾陰陽反移之離
 乃大有秋于是三河不至割裂方幅為長蘆倍公之力
 焉丁亥出按陝值歲大侵公一意荒政發賑勸貸迄無
 餘術至感神示者石為糗糧石爛可噉也奏石于朝舉
 朝咤異謂公誠感公按部務持大體不苛毛屑然所至
 不寒而栗即諸王國人各屏氣相下日毋觸吾驄馬姚

公他可知矣。垂已干事而竣，用俸劇移疾歸。歸數歲未嘗以戶謁。抵郡邑門，郡邑閹管不識，驄馬姚公何狀。諸守相令長無不凜凜于姚公。甚者辛卯起補浙江道，出按應天諸郡，所轄隸強半。公所舊耳目地，一切剷除，興建風裁之外，佐以陽和，然至郡大吏有所憑依，訛法則又露章糾舉，略不假毫釐。人相指謂曰：此其爲真御史邪？及報命肺疾，以作又驟聞封翁疾，疾置以歸。尚及扶持未幾，罹于大故，哀毀踰恒。丙申服闋，猶委頓不能。北會臺檄屢至，不得已，趣駕入臺，補河南道掌道事。川

臧掌清理軍政，拾遺疏中多冒時所諱。閻尹爲政公遂不能一日安于其位。于時直言見譴，南北省臺幾空，無人而公與諸省臺愈震赫于朝。先是權璫煽焰立貴顯人，同年某氏風公往請之，公曰：七尺之軀與三尺之輿孰重？君且休矣。聞者咋指高之。公晚居林麓，杜門掃軌，卽密戚執友無故不一面。遇婚喪可哀憐事，則不恡傾身傾橐，期于得當而後已。擇地營兩塾，群諸子弟延師誨之多睦，咸籠致焉。公奏疏剴切，及他文爾雅，稿多逸去。亦見公生平任質不銜云。公元配孺人李處士公師

來禽集 卷之五
儒女敬共勤儉于公多所毘贊其仁逮遙勝慈遇諸子
尤壺德所難與公生同年先公三年卒侗與公甲戌同
年又先後臺誼甚暱文光謹筮某日吉葬公于某阡
舉李孺人合以諫議盧公狀來徵竈中文侗卒業日狀
饒言之矣奚以志奚以銘重違文光指乃以志乃以銘
銘曰拳壯之湯湯維我公之帶裳紫荆之巖巖維我公
之劍函侃直公庶義盪仁漸家政閭閻讐視王儉是則
公生平之大致而山水相爲無窮者邪

平原處士趙次公暨配孫孺人李孺人合葬墓

銘

平原非故郡址實故郡四境其土域衍沃康阜其人士
醇明韶秀與他四境異而閭閻高門則趙氏更稱殊尤
遡趙之世代以耒耜詩書爲政至長垣太公貴矣貴以
長公廉訪前令封爵云次公太公次子也次公諱輝字
子觀太公凡五子世用諸趙擬諸竇而次公丰儀峻整
負絕異姿磊落忼慨耻爲人間瑣尾態俯首就帖括圍
圉不樂也曰此二三罔擱囚吾吾將以計硯猗頓爲師
遂同邑人蔡氏子徃假張氏母錢萬與之窮徵逐之術

問諸剝卜告吉首仰足開內外自橋外復自垂次公大
叫曰神其詔我矣吾其擇人而在時精萬貨之情而修
之居恒謂天其雨粟吾將倚建元景元乎而不其然歲
熟取穀予之絲枲疇其方跽據樹而嘔絲乎而不其然
璽出取帛絮與之食而務完物而無息幣而無居貴而
揆上極下極相反之數而令財幣如流水而薄飲食而
忍嗜欲而與用事童僕同苦樂數年之內所榮畧擬中
陶是時太公太母無恙在堂廉訪公仕久外也廉訪盡
付家秉次不欲妨叔季輩讀次公上奉二尊醬汁必親

下佐諸弟膏油以時晏息夙興位置內外靡不有條至
于其賦之田立斂之宮時耕時耔時樹時畜勃率龍蹕
儻個稽固無自愛焉且又儷皮溢米無自私焉每心自
語譬之燎原家則火焉藉芳而燔者非夫也吾兄吾弟
其將無家何蓋隱然有卜式薛包之思矣往所同假張
氏母錢蔡氏子見公寢盛心不無內忤日計毋錢負盡
以推公公盡任負蔡氏子一旦無祿張氏之世微矣而
公颺言于衆曰蔡氏子推負我我復坐負張氏爲夫倍
德者不祥乘敝者不義乃大傾困積而償之券乃以折

公起家于馬要務環務而居者就公如赴歲貸問左粟
不擇寡人子廬兒從傍曰寡人子奚貸也公曰司城氏
爲大夫之無者貸吾乃貸寡人子庸何傷近曠龐某廬
于墓公造廬遺之物曰疇無父母此其夫氓社稷之望
也爲患于所司而表之及家漸裕絕無張設蔣蕭不以
纓栝盃才流漆墨而已太公卒苴麻泣血每戒諸子曰
而王父壁間之署可讀也署爲言行心術語公實兢兢
不忝詞訓云諸子亦如長垣太公滿五人課諸子請諸
夫夙昔以膏油佐諸弟時顧其科令獨嚴不少假焉

不令與匪人交曰薺尼亂人參鉤吻亂行華爾曹勿爲
薺尼鉤吻亂則幸甚公善心計卽研業遜之而以靡密
繁夥丁其躬蓋營綜者及二終而公瘁且不起矣迨于
殮殍太母憂不食洗瀾而視公猶漚冠詭從枕上譁其
爲孺子慕真終身無間可謂孝矣配李孺人忍痛撫五
子逮終喪人各成立閨闈以內莊于寢門之外斬如也
五子秩如也諸姒娣穆如也孺人蓋代次公父而以身
母舊貫一新後公十二年亦用瘁疽發背卒侗于公爲
從子婿分宜執役墓石誌曰按狀嘉靖末年倭與夷交

詔募六郡良家子實遼陽塞山東在所餉邊矣所坐
鄉有秩嗇夫自行賁送而公以次當行于時盜劫彌滿
燕趙間道盡梗里人調謂次公辦裝抑能辦賊耶公笑
不答乃爲襦襜服裏衣中褚衣帕首鞞下若上番戍而
所乘款段馬穴鞍橐其中卒以無虞此其智畧庸衆人
寧有哉今元菟樂浪用兵急軍興以萬億計白金一流
不能致一石粟議者難之使盡人趙次公又何慮行間
乏食乎余竊竊歎焉乃系之銘銘曰三十柄柄積戩人
境於志有之斷幹極統赤亥花練時逼左閭於志有之
貧而不書人而無禮狃康及米於志有之李代桃抵動
不見非濁水之微於志有之我貴知稀不雕而璞人倫
卓卓於志有之吾謂已學城隅之阡隴時豈延於志有
之億萬斯年

刑部貴州司郎中雲門魏公墓誌銘

按狀公諱允孚字懋誠別號雲門家世南樂南樂之魏
天下莫不聞而公于魏爲季子封刑部主事節齋先生
其父也母楊太君贈安人節齋先生以明經及貢先後
爲青州鞏昌郡別駕潔廉豈弟擅時循吏稱而于諸子

則又躬自督課之長爲光祿公懋忠次爲吏部公懋權
公以最幼從兩兄切劘淳湛能自得師于父兄間而以
性夙慧十歲能屬文十六遊膠庠又十年舉順天癸酉
鄉試明年成進士其成進士先懋忠三年懋權六年筮
仕爲吾郡理吾郡濟南名東方第一煩劇區刑名牒書
多倚辦理官而屬傍郡大獄最難亭平者御史臺率下
記嘗之矣公一意不爲動加精致誠求當情實而後已
昏夜治爰書手書戰瘕一字不肯假胥掾諸胥掾吐舌
相異謂我曹閱人多矣安得神明練核如我君者又我

君少安得更事如我君御史臺及撫中丞每出公所平
反暨所置寮吏臧否向藩臬稱賞不去口實以故名奕
奕冠同儕凡六年慰薦之書二十上而以不勝忌者稍
遷爲刑曹公夷然曰我生之辰職當治獄刑曹固宜以
之遜晉爲員外郎中有胡都御史龍同知用大相指殺
名士無辜公論都御史同知抵大司寇風欲奪之公執
不可而會大理少卿王公獨當公議嘖嘖比部名郎矣
乙酉以行誼文學推擇爲山西考官與吾鄉淄川吏部
王公偕兩公岳岳正氣連鑣並馳一時識拔皆純粹士

程式之文獨號馴雅序諸後簡者不寒而慄凜乎冰之
 在壺也明年啣命恤刑河南日夜為囚原所當更生
 者數百人蓋八郡之牘數倍于他方伯之輿而公亦浸
 倦不支矣在告二年所竟用前疾終狀稱公事親孝居
 家整整有法以余所覩記何如也公踰冠為理官已為
 刑曹已出為欽恤王人離佔畢而服官常什九皆刑名
 事不虞闌入失出乎乃公以當節齋先生心而稱無闌
 入失出也先生乃從懋誠臘哉郎署如林被文衡者幾
 何公能矢天日樹人材以若所謂嘖嘖名郎之譽業遍

位著公卿問寧獨泉王公一人而已耶官垂顯而身

弗逮名欲成而年不留此節齋先生所以愴懷于舐犢
 而懋忠重慨于人琴也嗟乎先是懋權死死憤邑國是
 乃今懋誠死死盡瘁活人三公者獨懋忠在耳孤情絕
 俗巋然魯靈光魏氏兄弟死生之際可以觀世可以程
 人公有近體詩若干首懋忠為殺青行之餘論著多逸
 去不存銘曰繁水之陽三鳳雛九苞耀口名寰區胡為
 鶴令原上呼季芳逐仲儵爾徂繫仲泉臺吹管乎乃邀
 吾季和且愉二仲無忌伯也妹神其式相鳴天衢

勅封安人張母夏氏墓誌銘

蓋安德有元羽張仲鳳翼云世名胡氏春秋學而元羽
尤磊落感慨風雅愛利握一方月旦權衡名隱隱起海
內乍而卽之不知其猶諸生也其交于不佞父子兄弟
間歡然骨肉靡間又兩家外內相問遺無寧時嗟嗟張
母吾母也則余何敢以文詞自愛先是張母寢疾余不
及稱水量藥負元羽負母也則余何敢以文詞自愛所
謂不敢自愛其文詞則元羽以母納壙之石見屬云者
元羽故得幸于弇州先生父子矣而王長君復走信自
都力任不朽張母者于其尊尚書公乃元羽服匿辭若
曰崇已屬之邢君謂不佞侗習母深也則余乃今而後
何敢以文詞自愛按元羽所自手狀母封安人夏氏觀
察府君元配也系出會稽夏后氏國初徙吳縣有以武
畧起家爲萬戶者尋以豪不羈坐遷德州衛編伍中遂
占籍爲德州人其任豪自若而晚復削竒爲德更三世
祖爲林林生處士奎奎有行誼顯重百里娶王氏寔生
安人甫三歲見異于卜相者前謂女富厚貴壽不可言
俄不見其處而處士公內懷鄭重不輕諾迺者張大父

承德公有心計意夏公鄭重女必非凡女爲厥子次君
擇對而處士公顧獨有會曰此一介嫡女得所天矣十
九而歸觀察先生目無睨視足無仄步風儀進止雅有
常則三日而廟見則爲潔厨調膳奉尊章息怵如也翁
媪怡然色喜曰見有婦矣已乃出椎布懷中曰小家子
知有操作耳一切米澆衣絮必親膚爲鞞塚夜乃篝葛
籠而燈木綿絲桌縷縷出諸其手中而觀察先生方與
左邱明一編上下也四壁青熒夜闌相勞第曰苟富貴
母相忘矣于時茶有邱嫂安人莊事之即一切倚爲治

辦然而不敢名勞比爲兩叔娶婦則又損不腆奩資及
觀察先生既廩之入也承德公絕意德之而安人則復
安二新婦于家曰堂以上二老人爲政堂以下我孱然
四女子爲政毋若他家闕然讒間簾帟與突之際戈劍
戟如也迨嘉靖癸卯觀察先生用春秋登上選明年成
進士里婦屬垣相嘗而毋獨欲然自下日子大夫數百
其曹矧而子大夫婦公磨何足比數而從梱內自高標
榜彼夫孟姬梁婦系何等官闕耶而百世仰之婦貴自
持矣無何承德公捐館舍襄事之不愆則毋力居多丁

未除服將從觀察先生北裝行矣強姑在侍不可則曰姑意便于家新婦安所得宴然于塗恬然于都也在官日夕猶太夫人臨之而會歲時伏蜡必飭具戒僕起居太夫人前已次第逮張氏族不遽及夏壬子以觀察先生戶部主事上績封安人比為三女子治出嫁衣被重重耳不踰後也且戒之曰吾昔嫁書生才免王章牛衣中涕泣耳汝輩被繡衣帛幸甚夫安得糞土庶吏五斗而競此無益之觀為我死不願也不見東鄰黃荆作釵又不見紫綯溝中瘠夫非人子乎汝曹為人婦行矣勉之已而觀察先生出守潞子潞強藩作梗陰中前守去先生意難往矣安人從容謂潞竟當不除吏耶而丈夫擇官在政不在官而丈夫擇地在人不在地先生為發奮斤斤自勅剛柔互出一事必證諸安人而後行卒之和寧百姓晏安強宗助繇內焉安人時課童行後園治菜布帛遠瀕于家及出諸手指都不假外市郡人至為歌之曰氓乃有八口我君獨無用邠駿聲遷副使兵備密雲密雲故兵數下時權相驕帥非金裝萬計不行矣而先生獨一意策虜必欲探甲馳塞以當任使安人曰

而先生獨一意策虜必欲探甲馳塞以當任使安人曰

得時而駕不得時則龍蛇今豈夫子張膽行意日耶且
顯然布幣行禮君素羞稱而一官如寄矛頭浙米劍頭
炊飯何爲者何如拂衣高謝五畝敝廬無恙手而矧二
三豎子大者任薪水小者跳地作虎子一咲相樂人生
適意耳觀察先生領之而力解綬歸歸而偕隱者七年
晚移第城中方圖終鹿門之操而先生無疾長逝矣時
乃乙丑春仲也安人哭聲震動四鄰悶絕者婁矣誠不
難一身殉地下而會仆地耳中錚錚作聲謂兩兒子安
在兩兒子性弦葦不均浪汝以立汝生平味淡茹苦且

三十年至竟慈航泊岸然今堯示寂期也兩兒子安在
良久甦以耶真耶繇是稍稍強劑節哀勉已奄窆之後
而後周視兩兒勞伯于鄉曰無忘昨也勞仲于邑則曰
爾父其才足倚今者去具戒之年幾何而促局轅下一
寡婦人將何所適不戒之辜而令千里駒跪足乎吾平
居目矐心動上扣九閔下詣三泉靡所藉手稱後死也
嗟乎夫非義方者耶狀稱安人音響洪亮以故終身無
咕囁亦無嘍喏家人親黨遠近大小以嚴見憚夏氏諸
舅來必闔戶與語所至宦輒無錢乃私藏曰婦人橡栗

漿汁之外無交也佐觀察先生均視一兄二弟推與美
田宅迨老強近期功無間言臨二婦成幼無異莊敬相
劑曰爾輩試出葳蕤之鑰倘有一鎰金一縑帛吾當呼
爾作姑至于土毛之賦則上下諸姻黨貧者不敢後疏
者不居薄且不好乘人之敝務剷已名德禮佛持齋精
虔香火斷機之次薰爐經卷而已元羽近復沆瀾占叙
戊子當省試也毋畧減七箸夫孤趨且不敢成行毋爲
詳進一杯糜孤抵歷下會雨潦又東人士譁不安于主
者毋爲憂之曰得無挑蝕李代之僵乎吾家不滿調吾
知吾兒免矣及孤垂翅歸則又陽慰之曰得不蒙惡聲
足矣吾兒去嶮嶮不翅十舍何渠憂一第耶自是毋疾
滯如禪藥不御神理漸極更十數日無一語瞑矣夫毋
氏百心慰藉孤孤無寸策起毋疾疾此孤所爲拊膺疾
首躑躅悲號而無一郤自容也嗟嗟元羽苦心余不爲
志其孰與志銘曰夏后之先神明胄也自吳祖東名靈
後也有女丈夫惠以禋也相厥哲人早末譽也啓爾後
昆大造張也衛河湯湯折而西也千秋萬歲視茲靈也
勅封文林郎永平府通判後齊馬公墓志銘

馬公諱廷荆字汝茂邑學士大夫稱爲後齋先生公先世爲勝國名臣家雲中迨高皇帝肇造區夏徙我土遂占籍爲臨邑人始祖昇生駿歲貢太學駿生惇領歲化間簿書授臨汾知縣惇生錫領正德間鄉書授真定知縣後齋先生府君也真定翁先娶于呂後稱太孺人舉五文夫子其四半用茂才異等著稱有衣冠不礙灑田里一而公行列正第五雅如昔人所謂不減驃騎云者繼呂而室爲趙太孺人丈夫子二一與公同舉鄉舉一在膠序久負雋聲兄弟纍纍儼然在桑趙太母自字之門閭壺儀爲一邑冠冕不忝故扶風燁燁關中矣公在遺孤中爲最少于時尚任太母襁褓一切能順母心意無纖介觸忤孝誼若天性然已更數禩值真定翁大戚蓋廉吏之室馨如而七子者嗻嗻一寡母前懸旒耳公獨泣謂諸兄弟曰吾馬四世科貢殊不汶汶而今父死家貧遂令斷機之次無估嗶聲卽我孱然七尺者七人何以謝地下慰地上也母子兄弟持抱泣各益復下帷矻矻未幾公卽繼踵諸昆旣廩學官儋石之入佐趙大母朝餐差足自力而會太母拮据壹鬱痰乃作劇公

則問醫徵藥先諸兄弟足重爾夜十起潛伺氣息小未成眠歸則淚光熒熒枕席間無休矣歲嘉靖己酉領鄉書遂得漸竭志物甘毳美新百計羅致千里而外函封輦負數數不稱勞上事諸昆下撫兩愛弟有姜肱大被之風閭第之間穆如賓友孑然一子終身不置蓆蓋與張孺人相莊白首也外家二老人無倚公處其館甥生養死葬一如家人禮此尤末世所難者公天質木樸器宇閎重文史之外一無餘羨好作八分書綽有漢法保愛細帙什物隻字片紙不令在穢淖見則手理之青燈燎之矣中歲以還日益勅厲屏絕遊讌左規右繩無少墮行庶幾寢處不愧其形影者少減弱獲戶闔爲限內言外面居諸不交自奉一簞食器而賓筵獨饒裘踰必數浣而奩送頗華一錢不苟授而諸群從子弟又無不沾溉餘沫小逐什一婚遣厭意備調無虞鄉閭長少無不嘖嘖太邱太邱與家侍御公埒聲等頌矣數上春官不見收乃謁選得保定之安肅政平人和邑甚安之而以直道左上上官意量移高陽高陽視前地如斗矣公則曰上有擇官我無擇民一意撫摩其疲瘵而運之精覈

首籍學宮捐俸錢若干緡畧無恡色沙河之後銳然百
年所不任之力而不日成之徒枉輿梁抑王政耶有其
舉之矣至于清繇平賦條牒詳明平反大獄當法不苛
則其灼灼大者邑人至名爲慈母爲陽春蓋有惜于大
寒之後云已政洽則令子姪輩迓趙大母版輿至邸中
其毳美新之供視孝廉時不啻爲倍率其配張孺人暨
子若婦朝日一朝日三上食暑則繁辟躬御統扇曰母
無苦襍襪乎迨嚴冬則施罽幕而地而爐酒脯在列戲
爲黃口帝曰母其割炙賜兒三世一堂哄然盡歡曰兒

得一日藉五斗奉晨昏及母無恙兒幸甚太母乃簸簸
泣曰垂老乃及吾第五之成而食其報也老婦幸甚凡
五載無紕政以皇太子大慶直定翁受勅二母得稱
太孺人身受勅及其妻尋遷永平通判永平故塞上
郡當事者授半刺意不無重借而值樂亭缺署則以公
行公至則剔蠹䟽滯三月大治贖金未携半緩入郡齋
諸上官擬且以塞徼勤公而太母諱至矣承訃扶服望
廬而歸臥苦枕塊足不入中門恃粥乃勝語視杖乃勝
起日夜孺子號者凡再閱月而漸輟聲衣衾棺槨皆夙

調大脩木若以美矣迄襄大事一出橐中月俸易以佐
戚觀者賞歎馬公之慕何但五十二云爾也公自是亦寤
邁疾無復仕進意會故部使者巧于相成坐公及年當
罷公怡然曰速營一邱吾將老焉不謂疾日漸深猶治
家人生產不衰謂其子曰我非白首刀錐爲若輩虜正
虞農則妨讀也我三仕所入俸錢幾何而勝若輩坐食
吾營營十畝豈得已哉至所自勅厲視壯視少不少易
轍晚好岐黃之書意在藥餌活人而今已矣痛哉我邑
大夫劉公榜其私第趣爲鄉飲大賓亦與家侍御公儼
嗚呼古人不作古道稀濶若公者去無懷葛天何遠哉
用相人術占公方面虬髯體骨龐厚是宜百歲而竟用
未疾終也痛哉痛哉卒之日衣冠危坐神明湛如第曰
余素不違天脩然若脫者又三月而其子亦相繼隕歿
所謂不違者安在余每過馬公之廬未始不咨嗟拊頓
致嘆于未定之天矣雖然桂林一枝厥秀亭亭不于其
身與子而于其孫遲年一紀余拭目俟之矣天平安在
其爲未定耶公猶子應羲吾黨聞人所爲狀公者不忍
成目且能經紀公于父子死喪之際細大無遺余姪王

茶與公子爲姻親亦能周旋公家生死間吾曹不落莫
矣銘曰公家之世維扶風胡元末季栖雲中黎邛占籍
聲教同科名禮代文戰雄迨公中葉紹裘弓一方籍籍
襁儒鴻人倫傅美天可衷詎期蒼昊多朦朦官兮未暢
身委蓬緊有厥嗣淪蒿菘國人相叫憂且冲善人何時
依可宗遺孤五尺氣如虹允勝素荼十畝宮良辰重九
先六春歸兮爾宅樹且封孝庶千載石可憑我文爾隧
相無窮

進階中大夫福建按察司按察使平原緝齋趙公

墓志銘

余于平原爲婿鄉受室于趙而廉訪公親則余內之長
伯父也余得稱岳伯父云于情則尊于里閭誼則先生
長者且其鄉行宦蹟赫赫滿聽覩穿中之役余何敢辭
按狀公諱焯字子明別號緝齋趙望天水于姓苑爲天
下族氏第一平原之趙則出樂安縣寔用詔徙以國
初至遂家焉世務農瑣至封翁惠始服賈庶而善息卒
以饒裕生五子公其長也公墮地異羣兒五六歲許儼
雅若成人八歲肄于塾所受書輒琅琅成誦任氏父見

而異之曰此國器也字謂封翁喜極深相結以故兩家
通爲婚姻至今不絕焉迨公稍長隸弟子員益刻厲向
學所爲文不蹈襲前人一字夜讀恒至分漏聞雞卽起
令人以楯警有矍然之思矣日督諸弟業不以家務相
勗弟所當合醜錢用往往爲代辦不使知邑王令素重
公延公暨諸名士爲要會一日諸課皆先成公潭思獨
後甫出舍則棟折壁頽當公坐處几席墊覆盡糜爛衆
相咤訝非有鬼神不及此是歲戊午獲省薦禮闈凡數
躋公矢志彌苦二歲不澣服文益精進遂舉乙丑試令

得長垣長垣畿南巖邑號稱難治公至一意行三尺罔
貸獯獷然于平民則極心噢咻賦繇手自上下胥吏不
得窺其指最嚴群胥蓋重足一跡焉有布商被殺獄公
禱于神神憑病幘人語曰城隍索某卽逮某訊不兩言
服一民妻戮瓜塲中跡所傷顛屠挺斫公召屠曰爾等
勿恐誰假爾挺去也一屠謂某假挺有日亟名捕之不
訊自服歲大旱公憂惶廢寢食大舉雩日治事于堂夕
一襖被廟所恒齋四十日天乃大雨鄰境皆不澍是日
平原鄉曠獨澍異矣適當齋郡倅過其邑公一切肅給

獨縛牲不殺倅得故以告直指直指賢之會報最與注
上考例封封翁如爵胡太君蔡夫人皆如制未幾
入拜河南道監察御史以嶽嶽敢言顯唯時平原因大
繇所遣佐傍州役動損數百緡其在邑供辦祇候費計
且什百徵兵坐戎馬一馬朱提率十流人不聊生極矣
公具言兩臺曰平原吾鄉縣也吾安忍吾聯井荼毒至
此臺欣然爲汰去其甚至今安之用資按廣東不以南
粵險遠嵐厲有難色抵舍省二尊人二尊人爲辭訓之
曰南粵雜夷且萬里中丞主拊循御史主六條察今日
之政勿隱爲義汝慎勉之公拜受教促駕行值廣東舉
鄉舉公勅衆維謹期勿負士負
從棄牘得一曰此當連第無稽固者宜冠耒耜曹遂首之
衆心若不盡諧已而果成進士同事始嘆服粵人多嚙
檳榔避瘴氣公初不爾及于疾已感竒夢始嚙檳榔痰
乃間已復夢人告語曰公病良已然非服補中益氣湯
加白五味子弗全瘳也覺索白五味子醫工莫以對已
復夢前人告語曰白五味子卽枸杞子也寤而索之一
飲卽奏效粵故貨藪珠池番舶之爲厲階甚公峻通山

網水禁民以不病地鄰蠻府軍興之不給公則劑量百計客主悉無害及瓜不持一珠吏人廩廩于包端州矣侯守怙內援穢德彰聞公疏其諸不法失當塗意叙轉江西叅議以出歲餘改陝西再歲遷副使又再歲遷苑馬卿兼分巡平涼邇儉塞非移中監比馬政告弛廐尹失職久矣公曰此莫非王事莫非王臣振迅拮据清刷屯牧獎令人與馬相習馬足芻秣資寬然孳息季年馬乃大倍茶馬使者薦于庭田秦多大盜與鞏洛燕趙要更互爲囊橐莫可究詰遠買山棗強界遇盜戕于途獄

連多人撫其屬治獄急人多誣服死公于秦隴獲盜盜告棗強行劫狀移文案驗盜實戕棗強界中買歷歷明白直指具獄馳上旋報平允盜坐法誅棗邑繫餘累人獲全活者數十家矣用是撫其內愧听之以公入覲官不宜縣次續食論謫少卿公茶遷山西按察使而秦兩臺以馬政留改陝西按察使兼馬政謫則視故三品秩會亦以外艱赴奔于家公淹秦得寤後疾至是轉轉以劇朝一瀝米夕一瀝米哭聲若斷絲殘竹不相屬勉已襄事形意俱瘁所爲率諸弟修色而娛胡太君者萬端

絕口諸弟出分事凡三年孝弟爲鄉閭範馬服除補陝西行太僕寺少卿復遷苑馬寺卿頃之遷叅政分守臨鞏道鞏昌土素瘠悍乏水泉卽經長數十丈猶智井也公爲苦之按視近郡古澗河可治卽掘引直郡中家家池沼貯充然口食而以其支旁溉沃田數千畝民以永利人名趙公泉比公竊竊自語曰成紀之赤子孑然矣安得賢守令而相與撫綏生活之令連某乃與其元元讐誅苑于枯靡所不至取逃賦而加貧民若陽爲調停嘗省而實令民倍等輸民見賦溢額一時譁呼幾作負

杆擾愬日以至公謂爲白高請以建謝百姓然後以當職謝連臺爲愕然更廉實論奪職去公以是年齋表如京師歸丁胡太君憂居喪摧毀不以禮稱年至迨哀悰仲弟奄謝所遺諸藐孤有踵相接公覆育化誨懇懇不稱勞汔以成立既葬胡太君始從諸弟議析箸初封翁負宅屋資公獨貸貫以償又捐俸爲二尊人營室卒不自有盡推與諸弟乃什器田產渡占瘠下諸弟每向人吾伯氏真所謂仁兄也服除補福建叅政分守建南簡重清理閩人甚宜之而用前所見劾令從中媒孽吏

垣評官以老入彈事然卒不能註履素毛毳曹議爲屈
加按察使銜致仕歸歲餘前令猶據引河渠事謂公受
富人金錢役民掘水爲人灌田公笑謂渠在彼中爲公
爲私灼然耳日間吾何置辯爲已而其說竟不行先是
原邑儒學元武庫下堪輿言當治公帥先畚掘衆力合
作遂隆隆起及閩歸乃遍行學宮證前堪輿語爲籍以
勸薦紳無不響應卽巨姓賈豎亦均財力土木乃大興
公旦日露蓋躬自程督時捐食爲勞三閣傑然霞起文
物改觀而公子之子女之子兩及捷科名邑族姓蟬聯

自今日始焉公居平以二尊人不逮含殮爲恨朝暮詣
主前焚香叩首數下具餼墓所朝朔望歲以爲常卽小
疾苦不敢廢而公念蔡夫人誓不再娶夫人貞孝儉睦
卓然女師公從閨闈間相禮如賓往公西秦後夫人病
不能從未幾捐謝公慟悼居諸不能已維時甫踰五十
至終身不蓄姬媵晚歲蕭然一榻一蒼頭炙衣一平頭
淪茗三十年日不接婢媪侶歷官所至二三僮僕隨布
衣麤飯自奉簞食噐每日薦少滋味耳負性孤特卽燕
居無褻言嬾容望之栗栗就而傾挹則又盎如春陽忠

信篤敬家邦遠邇人盡愛戴長垣爲生祠祀之秦隴有
故吏故民頌德碑公好讀易動則占筮旁通醫術時賦
藥活人門多乞者雅意置義田未及終事心悅城隅西
比菟裘而安之病及殆不從諸子請還城居其寢疾則
仍前寤後證在簣十餘日卒銘曰平原膺膺乃生愬人
敦仁履義茹粹含醇疇其雕鏤公則璞珍疇其風波公
則恬津如彼五色素質成彬如彼五音宮響君餽官歸
吏範鄉推天民內行卓卓夫孰與倫王少府葦陽道州
隣八方宗仰萬衆主臣挹其嘽受論慈振振提提其遺挂
浮光劉相挾日者及相人術遊余邑余仲父斷事公父

寓公劉叟薤銘

侍御公宿昔恒衣食之余仲季泊群從次第亦給少衣
食不乏且三十年其人嗜酒卽一錢付酒家貫醉輒道
上臥若瀕人荷鍾者醒則若忘居常口不道臧否衣履
垢污不可近中實饒如也有與疑年曰老人今且八十
矣而疇逸余之大勞而疇爲余築糟會邑盛疫死于歲
之六月中余適之齊河余仲棺而瘞之城南之阡余歸

而痛焉為歲要寒食十月月朝若節春冬三屬僅酌之籠
 炊一椀濁酒一壺其畢余身其不畢余身以視此碣銘
 曰生浮光死道傍河間氏收以藏犁邱首邱胡必爾鄉
 爾終雖俄爾行實芳余其謚爾黔婁康

來禽館集卷之十六

濟南臨邑邢 何子愿甫著

墓碑

明雲南督學華容世其孫公碑

竊聞楚子之分繇洞庭以包舉芊氏之世至潘鄉而表
 大乃知地以氏顯季札之標延陵族緣區別瑯琊之譜
 文獻今華容孫公世其楚芊之苗裔乎世其穹清孕
 秀后土含氣少成富于天性獨立陶于詩禮兼之淵源
 者元舅埏埴者大師攻玉悉聯璜之彥在類極俎豆之

學逮夫王庭抗策皇路馳轡萬舉歛其振羽一軍戢其
鳴鐸刑曹展步兵政嗣握意欲扶地軸以結主絳天旗
而靖漠而值昌朝多故墻壁煽惑賈生抒其痛哭徐福
列其忠憤其所不濟命也何尤若夫遴簡典屬之役建
明獨偉分任禮闈之衡罕掩最盛斯其翁魁文武時露
一斑者哉已出督學逃在遐域文翁之禮教載起元龍
之豪氣猶昔仲憲故于巡方排人車于開府不悟青蠅
之侶遂闔丹霄之略也夫柔馴保孚于嬰孺犷悍鉅裁
于鈇鉞得其質矣而又楊伯起之暮賂門故轍卻任彥
升之枯麥兒妻其詛皎皎揚污職此故爾至于當官之
俸必購二酉之積稽天之潦首倡三板之作顧茲質行
有匪其聞于稽厥世則陳太邱其徒也唯是太邱鴻軌
垂後駟門檀美紀謚親乃箸郝群忠緬成燕翼元伯封
侯益邑恂溫並列五等及于林道位譽不之以蒙竊論
宗宜紀謚乎億傳群忠乎羽侯元伯乎穀兮穀兮顏行
似續其未可量也太邱六葉蟬聯我公七代俯仰程簪
笏則今少遜古哀觚翰則彼不逮此彼猶馮慙者公卿
此之不忝者風素矧乎六葉者有盡而七代者無窮哉

相提而較未足鳴其甲乙也羽侯以爲沉泉無紀巨壘
道闕貴在我躬皇皇愕眙于是問志于楚徵碑于齊志
本寧核矣蒙也何知聊括太史之言庸備輶軒之采庶
使龍門之坂常結想于李膺通德之廬終不沒乎鄭元
云爾碑曰華容之世楚芊先生射策彤庭前爰稽宅
相成忠宣信陽舍人呼阿元雍遊獨受高陵甄經學秬
文精以研初官西省法北便目無闔尹直若弦闔摧三
諫一死焉恨不賫與天公箋二諫同逐公卽收二載起
家官稍遷蠻夷置議通絕埏陸震創杖公獲全公爲錫

衰淚血駢友道一髮公差延禮闈校文公造員惟時所
蒞俱蕙荃嬖奴不軌公內煎賴公秘計人安眠邊將署
茗行貨泉公日亟還余纏牽一僕長營鈔髮錢一驅漠
驪走且遄數緡羸得主人憐小臣俸薄爾代田侍郎同
舍任巧僂主兮竅臣臣不然滇南一封公式遄淹中何
必歌與絃竭來荒裔風教闡五文五采交相鮮中丞無
良難輦篋公日人車疇敢專少年御史侵我權公日君
庖余執籩群狷爲政內聽偏公平視之猶馬羈飄然歸
歟賡獻狎瓦盆蒨篔無糾纏相君太宰䟽接聯公但託

言吾體孱褫禴庫幘厥脰肩客來徑竹吾手褰版鋪自
役口出烟萬人之室千人阡我公昔友盡豫梗伯安獻
吉尤翩翩閭門顏仲王仲連餘子同調良作緣出狗官
下處釣川况兼論著堪長年有孫驎駮祖父歎百世不
數昭王賢 公名繼芳世其字別號石磯先生以柳塘
居士釗爲王父以處州郡丞封臧方郎沱西先生榮爲
父以劉忠宣公妹氏爲母以嚴宜人爲夫人以孝廉宗
玉山令爲元子孝廉宜洞庭漁人海內詞宗爲仲子以
諸生完爲季子以布衣文雄斯億爲家孫孝廉斯傳爲

仲孫韞籍如父兄今補城武令勵操字人行荒湔宿浸
漫以循吏聞以諸生斯及斯保斯佑爲諸孫曾孫嫡長
羽侯出斯億繼公成進士爲庶常吉士爲諫官器業震
寓中羽侯弟蓄几十人通侯則斯傳當戶男弱冠負神
駿聲餘婚家姻家及諸元來以有他志傳茲不詳公得
壽五十有九厥生成化無祿卽世嘉靖間

富平令大梁王君碑

縣官王作無之夫興摧採以是闡使四布遍寰寓間天
憲臨赫地軸爲震而矧虎假觀于旣翼狼對頰于始貪

辜較頃烈于鈔竊蝨蝕滋密于螟螣者乎海內盡爾關
陝允劇焉于時士人咄咄徂明哲之云萌隸感感下無
從之涕孰有挺身犯難如富平令王君者王君名正志
字淑明戊戌成進士筮仕爲富平令以待御公爲大父
黃縣公爲父奕葉縹緗不忝瑯琊之緒聯翩甲第大衍
長淮之流淑明厥兄濰縣公力撫少孤備極友篤伯淮
之被常燠汜毓之衣遙徹義方厲于厥考切劘勤乎礎
礎以故淑明志操不貳彌益穎拔加之天性孤潔雅嚮
骨鯁童而之塾恐遺錢之塊已髻而破卷至請劍而抗

顏迨夫稍長竊謂龍比斯夫某平乃世慕岑晬之董正
嘉范滂之澄清以葱葉草飯爲高致以耕息偃詠爲上
流半面之交輒甚口以理折同儕之睚率失氣以虜服
濰縣公居平私憂之調謂阿季嶽嶽不虞朱雲扼其角
卯淑明內不無動意卒難下及爲富平精心出教狗我
單亦渤海移風于牛犢濮陽韜光于輿玩青天白水官
方稟焉而所最介介者刀鋸兩墮之夫數擬搜斜谷之
路書備陽球之劍客鳴散蒿目寢啖不遑久之密要勅
號日恣西園之騶金玉列牀恣憑張洸之畫骨寒乞以

富殖肆田廬之發掘騷然四境讐犬駭鷄矣甚乃我民
陰附爲囊橐彼醜實藉爲姦利淑明積志所結其能舍
旃于是逢怒益深縱輜轉至多方橫逆領邑若焚淑明
遂決策拜章爲民請命死生禍福一惟置之賈長沙並
其太息而輸其痛哭陸敬輿多其婉致而乏其峭直蓋
無不盡人勅色舉宁吐舌而此曹飛條造語疾驛以聞
羅翳障天■詔獄斯下檻車肅郵亭之禁械枯極累人
之狀逮至榜掠加慘爰屬司隸繫焉淑明引分園扉讀
書澹閒有論著略無怨嗟凡歷三霜溘焉賈卒徵感

夢寐儼爲明神孟博託骨于龍舒然明歸魂于父母迫
諸漏刻臨命不忘者也嗚呼楸棺禿釘白骨聞其靡親
土壁瓦燈青蠅廁乎吊客良足悲矣歸視大梁厥姪職
方君任其喪事靡不合經置嗣惟佶庶免若敖濉縣公
華顛杖藜鴈行虛其接翅職方君壯齡巾幘竹林孤其
泛筆不第海內簪紳公共之慟而實王氏公子恨恨必
哭之私也■九重之闈正深六月之霜弗零姑掩黃壚
俟之青史云爾是宜碑碑曰含光承影澤之鸛鶉弗匣
而藏出以剝犀剝而不勝鏗刃殘缺雖則缺旃爰謚良

鐵厥謚奚以承影含光千秋兆歲地葩天章大梁之墟
煜煜謾謾風氣星精駭動萬屋譬君寶鍊君其謂何我
要臧方汝倡我歌瑣瑣錐刀用不離尺惟缺乃全劔兮
不死

先師穀城于文定公碑

萬厯歲在丁未十一月二十二日吾師于先生薨于都
城相舍之正寢春秋六十有三嗚呼痛哉先生神稟名
岳靈漱間氣蒲衣專聖童之譽思王破倩人之詰父兄
瑰傑毋氏朗粹而我先生家庭閨闈靡匪教學挽髮衰

舉降心名輩迨成進士擢東常吉朝涉殺青之部夜然
太乙之杖包劉股者七業羅安世之三篋商偃擅乎科
品顏閔翹乎德園一時曹論公輔是期尋爲編脩脩撰
太史擬終古之任禁近迫門下之署遞纂則兩皇之
實錄兼董則六曹之章奏寢膺日講時侍幃几啓閔道
于聖聽總眇論于經指王上多其端雅同列讓其奧
博者矣洊周麟德華筵前宿沈素坐司乎典帙贊諭職
侔乎常侍夫少伯者敦庸之副佐銓者統均之亞而乃
拾級以上八座攸屬彤伯入急乎宗周春卿嚮邇乎右

僕天神地祇之故綱目必綜科舉宗藩之貫條牒恒審
可可否否諤諤蹇蹇撫公議則闡尹寧置于氷炭狗國
是則平津弗計其鑿杓伏蒲之請彌切垂旒之聰愈塞
先生誓掃翳乎圓昊異揚暉于明兩而礮礮之變罔戢
折丹之撼轉偪于是仰天慈以婁句指地肺而隱跡周
公適遭乎拔木尼父不安于司寇鑣採則魚山之蕨綸
釣則狼溪之鯉雖頻年命相而終歲靡報安石不起如
蒼生何久之坎孺受端府之辟稚珪虛瓊條之價誰爲
尸之誰爲尼之良可嗟矣雲陰解駮鬱華啓耀中國條

相乎司馬阿衡晉尹乎王室太平跂足人流拭目而乃
一疾不起溘焉告終黑轡甫稅白鷄旋兆嗚呼痛哉先
生居乎溫盜遇事持整先是江陵奪情議起輦邸風靡
而乃憫焉發憤抗表陳奏脩郟者從中以傳會甚口者
競號爲多事及夫氷山見現柏奏垂斧先生剖明功罪
之準取喻帷蓋之義飛書纚纚禍以不極冲流屹龍門
之砥京夏快鳳德之獨可謂偉矣先生易簣之際忍死
載筆史魚棘表乎尸諫聚溷乞佗于君側遂致九重加
惻贈卹邁等持節屬其謹護輜輶侈以載道十七之餐

生飮酹餽之數死被榮哀僉慕遠邇響臻者矣先生履
宦近要賞資稠登疏金晏祿班親逮巡禮本寧儉貴而
安窶學徒不勸于鳴鐸肯災數勤于抵掌藩戶悉刀筆
之地褻燕著儀刑之美文章立乎正統訓詞還于大雅
括族則河東瑯琊未足以方駟程度則叔度林宗胡慙
于均蓐者哉先生兩借衡鑒驥勃樂廐布滿在列馳驟
賢侶或嗣厥政事或續厥文筆渡中之學未替河汾之
業不衰也先生未幘傳講及參鼎輔衾影洵以靡慙天
壤訖其無忝邁茲大故宜付刊記而矧易名文定厥典

煒焉侗念景鸞以齊詩見系元賓用殊操動軫商苞致
石于太尉曹甄標喝于涼國肪甯抒其赤狼後浦享其
義錢侗也業酌斬經遠就奔會高彪引紉侯芭土簣寧
敢後焉乃與元兄緯謀擊石佗山爰勒斯作以今視古
何渠不然先生名慎行字無垢人稱穀山先生詞曰先
生之生滄溟泰岱先生之器璠璣鼎敦出心八埏處慕
十賚如彼源泉滄滙灌溉石渠帝傳山東大師有本如
是流風在斯疇其推轂阿衡屬伊疇其收精輟茲綸絲
皇斯閔焉奪我尚父高蒼不仁虐彼下上哲人其萎有

步踽踽知我者稀永挂談麈詒謀孫子未締朱陳我有
息女敬諾王臣先生九地秣馬載帳言歸言告以健賓
姻元兄葬親靡或不競聿觀厥成前茅後勁四方來會
交口相慶世祿之家展也稱令穀城南畷帝予厥阡
廣輪宏曠俎豆潔蠲黃腸箸玉不崩不騫雲來赫赫億
萬斯年

通議大夫大理寺卿萊陽龍池張公碑

蓋聞崇壯上薄則培塿均其宗仰淵浚下滙則涔潦失
其霑灑乃臨深者委潤之資望崖者借蔭之具我萊陽

大廷尉張公其名山巨浸不可得而量測者乎按狀公
諱夢鯉字汝化別號龍池先生厥先家于樂安勝國始
古今籍高大父雄以行義散財被旌三傳而爲贈副使
公錕實公府君母蓋恭人公其次子也觀弧制弓受姓
始于列宿誦詩考仲論世本于侯誰公緣巨魚躍梁發
夢而生資稟絕異含醇挺靈總角屬文有如宿構家嚴
領面試之對里先謝比面之席已復羸勝負書之卽墨
學焉專經遡二十八卷之舊訓傳得毛氏一家之傳遂
從孺子之行抗顏大師之列昌陽不其兩塩官地交口

頌張次公明經矣一試補學官弟子又二年試輒高等
既廩于膠乙卯舉于鄉明年丙辰成進士射策之文見
賞當軸而以語少觸諱甲次不前視政刑曹曹偶咸下
之踰年以母恭人喪歸服除補戶部四川司主事奉權
濟墅關旋以父副使公捐館不果行乙丑起補兵部武
庫司歷職方司員外郎車駕司郎中王典判帳奏決承
寵于夏官掌領輿僕闇對不殊于閱簿唯時蒲坂襄毅
楊公為政素負人倫鑒裁每謂人張君朗朗超箸遇事
不撓六署擇名郎此為獨上九伯成國士此其絕塵矣

未幾以格得開封府知府出守焉開封中原劇部提封
百數染指最易剗割最難公一到官指河為誓龐參下
車宏攬置水之情任延致書率先祭酒之署以公方茲
不翅過之也比當新鄭樂聖家居宣麻計日泣茲土者
過門必入謬云西河式間之節挹膺下拜實踵張蒼家
人之禮而公略無遺問不狗竿櫝及以元宰蕪攝首銓
啣公欲發計以百出卒無端倪已而嘆曰老諄媿見張
君而公者又營救扶溝王令甚急新鄭詰之厲公正色
荅曰其在今日諾諾藩臬諤諤守臣彼自用彼法我自

用我法庸何傷令竟得免公亦以贖故叙遷兵備靖邊
靖邊介在陬落之間號名儉塞諸使君往往權使其士
虜使其民傳視其地警視其羌久矣公值初開貢市一
切熟計乃行威宣則六條並舉惠播則八風並翔藉令
給賞盡煩乎公帑互權僅充乎漏卮縣道敝甚公也患
之自公研慮以市竣市用夷撫夷絮纈金繒積羨如投
鞍之衆眊稚羊馬按堵循畫疆之要築塞代夫雲火剔
弊窮于雀鼠列障黨天聚困如洗興學講肄易馬隊以
詩禮休士粉榆脫烏延之翼跼此實張英酌酒所不及

籌謝琰拒氏所不敢望而天子眷乃丕績賜金晉俸
月異歲殊者也會行邊大臣王公遴極言闕下褒厲
有加且當大慶恩贈封駢至亦奇邁云尋擢山西布
政司右叅政職在督儲公爲察沃瘠酌登耗畝其鏞揆
水其牀牒法其窳媮劭其曷羨始之乎方田卒之乎芻
粟燭照數計驚謂猶神若乃設爲投櫝之規潛弭蠶食
之蠹則又唯晉作楷方幅取模者也及僉江南按察使
首抑訟師不三月亟拜山西右布政使董鑄縷環公乃
上記銅非晉產董子之鍊柱竭矣民謹則估以十倍官

迫則技噍五窮牒凡八事泉貨以流兩臺復以賦籍屬
右轄公乃心計手纂哀益成書書奏最當■上心厚被
嘉與遂卽其省爲左布政使不三月而順天撫中丞之
命下矣順天撫臣所部比漢三輔則京兆馮翊實隸之
間右避茂陵之原國中齒濟南之矚公一意斷擊戎安
元元揆厥大指要在節縮徑入蠲免積逋所節以十二
萬計蠲以八萬計畿內有更生之慶焉公在事三報大
虜三舉大師一禦古北而用裨帥李如楨勝是爲己卯
二月之役也再防遼前屯而用裨帥楊粟等勝是爲是
年十月之役也再援遼左而用躬自提兵先發伐謀勝
是爲明年十月之役也先後所禽斬若干奪獲夷器駝
馬若干數以吉語聞上亦數奉大賚叨白金文綺者三
晉俸者一而是時戚大將軍繼光帥薊得相負衛霍聲
公故備在肺腑畧無面從屬之讐柞則均敵其體屬之
規繩則阿保其任壯而踐石賤而斫莖靡不津津履正
允服高邈矣頃之議裁順天巡撫改公甘肅副都御史
銜未赴旋召入爲大理卿公矢心平直所亭平不更僕
數文內之纍抗聲明其不然夥沉之牘蒿目畢其宿閣

蓋君家庭尉相耳孫以不寃于公高門卜雲仍以駟馬
矣時江陵挾貴上人責公疏節風使暱諫黃紙微及公
夷然不屑三疏乞身俄而予告惟恐一夕不疾出設門
也歸而田僮荒寂恥爲更造因天盡地耕獲以時班昆
則卜式之在河南市義則孟嘗之於薛邑置酒衍衍乎
別館發篋豐豐乎慙嗣尉薦付之誰何履跡絕乎公室
矣且也體陳實之閔簡兼華歆之整栗感仲由之負米
則汎瀾下泣誼卻缺之餉饁則閨闈備禮異胞同產猶
子歸孫緩急周旋仁同一視斯蓋得之天屬者也以愚
而臆竊目品流譬之五音繁會則獨擅其宮五色錯陳
則獨標其素五味交和則獨收其淡五行代用則獨主
其土比之冒暉于外而餐誦于邛者豈可同年而語哉
公丈夫子四長乃計部君嗣誠仲乃拔萃貢嗣謨叔乃
饌堂生嗣誼季乃弟子員嗣諒猶夫鳳穴之羽無弗五
彩鄧林之幹動以干霄猗歟盛矣惜也公六十有五卽
于冥漠焉年誦杖國之期人軫相杵之慟尋聲肆響狀
云備矣逖芳往駕奚其遜旃邇者重部大椽單門義故
聚族豎碑厥亦崇壯巖巖後彥依其泰畔淵浚浩浩下

列傳卷之十一
士涉其溟際焉爾據公三品京朝官例應 降卹起墳
業已報可而公夙昔晉俸從一品其置翁仲以下石物
不得云侈是謂萊陽阡

少保李太公暨元配一品吳夫人墓闕

長垣贈少保李太公諱棟字良材人稱湖西先生由譜
祖四世而下三贈爲少保太公其一也配吳太君贈一
品夫人今少保兵部尚書于田化龍則其仲子云惟李
三轉著姓藐徙訾之裘馬一經世業陋滿籬之阿堵太
公孩弱孤立母張拮据長育躬孝源之菜食顛敷憚之

毀瘠時及受室值里鉅儒吳公者子將宏其鑒識叔鸞
慨以予女是爲吳太君太公性全靈稟行應規表少成
敏慧不假學習犀籍雖亡千人宛其口紀粥名殊夥一
閱爛于腹貯張大母遣就吳公學太公志略宏遠狹小
佔畢稍獵文義卽通大指乃以薛包之荒墳奪車循之
勤肄懼缺晨夕一意力田污邪蠲螺均區豆鍾釜之入
粟藪果布任折閱暉賸之變于是家以滋大慈氏晏如
會張大母孀節顯著褒厲有赫而于田兄弟于時適當
受學太公跽而前請孫業何居張大母手授遺書趣諸

外傳太公唯唯則爲置塾于邑張大母慕甘泉之畫椽
垂風教于兩子索靖矜其廟器馮遂精乎犧易而太公
田間鷄黍率內時供一堂三世爲樂可知未幾于田勝
冠舉進士高第太公訓言相誡若曰少年善惑者志易
衍者才侘攘每及于敗阿叵少詭于正一時後彥靡不
戢李父良箴于田以坎爲嵩縣令太公踰河如邸吳太
君板輿偕焉阿威無愧于庶質孟母弗戀乎埤鮓載彌
弦朔醪糈以歸迨于田周歷卽署洊登藩臬鯉庭布桃
李之蔭槐醜溢甘棠之詠旋升罔伯浸借建麾遼左絳

天旗以靖幕匡邑佇雲容而返舍翁媪安其綵養伯氏
叶其墳奏太公問東風之幾蘄倒西鄰之三雅八公倘
徉于桂對五湖逍遙于菱唱以方今日未之或殊有頃
夜卽告警朝命儵及于田難其私慊太公敦以大義受
脈爰戩秉羽卽事度瀘猝以棗燧平淮兆于禽酉忽形
妖夢太公寢疾移書咫尺慮遺賊于君父治命檢而毋
啣恨于含飯于田心噉耿弇之侍永惟張酺之讌據刀
坐劔拔淚援鼓吾父已矣其惟吾君距赴凡兩月賊乃
大平淺張匡之持節茂陳立之斷脰彌天之業成于終

天吁絜懃矣吁絜奇矣事定太真屢疏以請北幼度茹
辛而叙難哀毒纏于陽翟剗割深夫叔胄 皇乃西顧
遲以踰年憑棺之日則改練之會也穿復侈其異數醑
酌加于常等九原其慰焉于田百粒糝以過日赤鳥巢
以贅闌駛其日月大河爲梗 聖人喆茲保任惟吾勞
臣于田數控弗獲奉母以上沈濤湏彼白馬下捷罄厥
淇竹功幾就緒母乃亡祿腸湊夙沐口玉素歲九飯淪
于隕絕隻扇興其感愴 天子命以一品禮啟太公壙
合焉則以播功故云太公往喪張大母體二連之哀瘁
兼顏丁之禮制庭穀遂其物性家衆化其德美三族周
其禽構四境差其次火散懷則野老爭席狎盟則海鷗
成陣至于中閣持整如賓白首闕日儲用凜冰黃臘此
尤卿貴之世人情所難也吳太君引經示景披卷導寔
三方競爽咸母之伐且也焚券棄責輸粟賙急與國分
政于家而義毗贊夫子一德靡違若夫發千金之賄秉
謝瘞之節遡厥閨闈卒罕其儔夫鮑桓齊美鴻光儷操
不過闡微于閭史標軌于女士孰與起家衷褐偕老衮
狄侍中拜平珪爵令公遭夫家慶極榮哀之生死擅綬

養于天壤求之人代靡兩觀已太公以萬歷庚子四月
廿三日卒得年六十有九吳太君以萬歷甲辰七月八
日卒得年七十有四太公考翁繼古蘊負才略諸子孫
婚姻癡叙具載表志不再書于山向人甲戌同籍則鄙
趙子隰邢子相望齊趙藉甚文筆先人鐘石豈宜無言
伺也良久却避主臣則念于田中原赤幟野鶩非顛夢
白吾黨上座連璜自失勉爲結撰聊備餐誦詞之工拙
所不計爾詞曰苦縣受氏析箸蒲是則子路爲邦區河
流混混南向紆豕韋雕馬風弗殊此中二氣相與扶哲

人誕降鼓應桴大公含抱造化徒敦仁赴義恒不逋須
臆膚寸浹八都誰其尸此東岱乎媪兮自出延陵吳生
兒蚩入麒麟圖媿媿翁媪俯以痴天司慶澤如手酌名
家代產名世駒五文爛錦房星符人云天驥需龍芻
天子一顧萬馬駑德兮福報不爽銖魏邨之士神人娛
少保皎月水映壺斯文一柱千秋儒斯人翁媪斯掩軀
山輝玉兮水媚珠

陸令人墓碣銘

吳人王百谷先生天下士也旣塋其內陸令人之明年

來信集 卷之十一
函書戒使侑以趙宋之研竹篠之拂以誌屬余而申之
曰不穀亡妻奄然地下者二十有六年屬者歲在戊子
父母兄嫂之墓田治矣乃敢以研田之羨封之對之誌
則不穀任實無文聚壤之傍願以鐘石累先生余發書
卒誌咨嗟久之乃爲作陸令人碑陸令人者王百谷先
生元配也令人代居金閭二世而上朱輻起家曦易教
授官方家政卓然儒宗其裔孫子紹大府箕裘諸生祭
酒令人父也女子四人令人居仲百谷移第伯通之廡
企心德曜之搦二十來趨授室毘陵于時子紹暨其內
劉嬪頗奢浣婿之華豔乍卽王生之儒素炎涼未能等
視翁媪爲之慘顏而令人清心玉映雅搯冰凜柔攬剛
健少嫻長慮鳴環甫旦操作終夕安二人拵眠食樂夫
君之才彥頃之邛嫂儵謝家秉萃躬孱彼少女粹當筦
鑰口謝勞悴志極洒濯三族之駭藹然繾綣之誼一門
之內儼若朝宁之典縞衣綦巾苧縷繭絲寶釵弗以耀
首寒機用以卒歲起先晨窓之鷄眠及長河之沒廝養
百指童幼盈抱豚圈鴨闌醬醃盪盪靡一不什全其算
上下其手以故洽親附疏習器馴物大乃祠祀之享微

而褻臉之未必親必躬無厭無斃季女宛其有齋我姑
庶幾無忝矣已而蒯太夫人見背百谷哀過損神力歎
持內而令人拮据營綜動中禮儀生事炬塋姑慈嬪順
不謂房闈之流乃能當乎夫事者也百谷目無阿堵跡
慕義俠繒綺錢刀隨手略盡其先府君患之令人潛損
簪珥衣被以逮筐篋薄裝買宅兩區意將昉陽羨之蒐
裘佐皂帽于龍德白谷游燕貂敝奔吳鳥號憔悴惴惶
橐垂困窘非藉令人卜隣有豫乘屋亟其則半偈之佛
火漸寒解嘲之堂厦無托矣百谷又稱其屬續之晨施
予介然有美步搖不欲濫及女弟彌留目瞠尚呼愛息
鳳凰此尤不易割之柔情凜然士君子之風槩也令人
二丈夫子無曲無回英英競秀東南雙箭其他女子孫
子女以誌詳不再書百谷是役也蔗節瓜犀三泉之痛
既沉殘奩故總九迴之腸愈劇循題擗標望靈酌餞信
夫安仁之髻易華奉倩之譚不過爾敬爲標表而系之
銘銘曰夫也名下子也名下白日行天泉臺不夜夫及
遷汝子及塋汝白馬澗邊如鬣墳起後千百年樵牧豎
子曰此太原王君夫婦之室而牛不礪斧不砥者耶

端道人碣辭

端叟名松里人也其父爲巡徼小官以潔廉稱從井間
事先侍御公如父先侍御公視松則諸孫輩也松質性
本樸內實慧遇事非然有條理卽寓身賣漿胃脯間取
予不苟一錢獨好檀施道人佛子一塵一錫及門靡不
餅飴相款冬或給絮歲月以爲恒市閔及室闕取決松
一言卒醅一切解何費酒肉不惜已不自任德遠近有
善人名矣邑近郭泰山行宮圯松發願來謀伺募脩計
資銀千許錢數十萬米百斛不乾沒毛髮卽在僦工啖

一 栢粥輒出私錢償捺行慄慄質鬼神邑大夫邑紳士
爭榜其門比于通德此亦間氣布衣也松素持齋誦經
神恬氣溫顛壽者相俄于今歲八月中旬病痢不十日
卒卒之日爲廿有五得年六十有三吁嗟乎松不宜死
死矣所不死者視余碣言

來禽館集卷之十六

來禽館集卷之十七

濟南臨邑邢 何子愿甫著

誄

安邱大中丞馬公誄

有序

公姓馬諱文煇字仲翰定宇其寓號也爰自扶風肇望
渠邱占箸指次而論四公露爽于於菟五溪發嘯于章
掖贈公挺高門之彥門媪兆長白之孕公乃誕生于特
贈公寢覺體中有異以謂門恭人兒必先九吾宗吾不逮
兒成也越歲贈公卒恭人習茶集蓼丸熊畫荻公六齡

就外傳受讀稍長從季父受易獎助無資于同學警敏
動符乎上智網羅百氏藻斷瞻逸舞象之年一丘千里
俗季人僞洙泗頽經而公一意聖真希心六籍吐言被
律儀止詳整此已足緣彙識幹据標見影曹人邦族國
器預期者也嘉靖辛酉雋于省明年成進士以次令確
山指水誼軟泉之操戴星詣垂簾之誕烹割獨負簡覈
彌精王經誓不入乎私謂陳錡志專在于決斷概徼之
首途枉戮行販之中泐攫殺計以令吐實旋以當辜諸如
此等靡可更僕郵亭推轂書品公數十上隆慶丁卯詔入

爲山西道監察御史隨輟五日之制寵居八使之列淮
陽慕乎蕙汲濟南讐彼俠矚職掌所被寔先于齶咸陽
議均于盆價衛覬牒條乎監賣準今酌古政以大行積
羨十餘萬金蔗聲蔚起焉尋以病告未久起補浙江道
公曰毘筆非也埋輪庶而于是京師改匿加憚于劉祐
直方允歸于石鑒移讞大獄按法不阿執政街之乃出
爲德安守公曰二千石不負我我可負二千石用聖人
之清槩滌貪夫之濁范隨州牧意以賦論畧無所徇已
乃昉劉馥之立學追王尊之飭隄規世隆之埤雉擬延

壽之喪娶跡牽招之威服體吳仲之懷嚮郡以極治譽
乃上聞鄧晨之高第靡兩黃霸之賜金無忝甲戌璽書
還郡乙亥擢兵備按察副使治荆南瀕發旱魃爲沴旄
穉遜世公留三日齋虔露禱甘澍立降遍浦郊野掘埋
陋息壤之妄俄頃重遺棠之感泣荆有日人爲公難之
公遠惟楊震之廉靖兼任孫饒之惠化涓勛日無乎宰
執任防箴知乎豪右列燾所樹八方盡闢郡邑凜一臺
于枕席黎元奠三戶于盂堵竊念夫上游重區日厯討
練餘皇蔽江戈甲成陣長壑頃雄乎天險內薄靡庸夫
人力所謂蕭育在事南郡之盜賊滅跡馬敦建麾鄰羗

之部落攻心者矣凡四載晉左叅政兼僉事兵備荆南
如故屬歲大稔亟置振貸且與屬城爲要方今之際班
金鬻粟務令金粟兩生則人民全活贅聚者罰繼富者
治荒政之善天下宗之公尤如意才美遜東茂秀重精
詳第人文丕變省解南宮得士爲最文翁敦教于石室
柳君布化于遐裔以揆斯日不足多也比當江陵貴禡
■上遣第馬監奴橫行于所部請地闌出于非分而公
堅持不可嚴逮曠近江陵滋以沸然及歸治奠監撫削

均敵之禮冠蓋多屏息之態而公獨岳岳不下據坐無
避揖客警其洵有強項緬其自昔辛巳遷按察使駐武
昌楚寮吏咸惜公威公霽憲攄赤絕去浮與反陰礪于
桓東展陽舒于南紀浸尋仕楚晚歷大寮游卿之闕度
隲括季常之最良招納絜諸宗姓蔑以加矣癸未以臬
長上計當事閔其久次因拜江西右轄旋轉左轄居頃
遂晉僉都御史撫江西則江陵旣沒之又二歲也公于
時出教類以十事大都六條課吏百計便民十三郡脩
守科訓毋敢踰越獨臨江守殘鷲不戢箠殺無算酷烈

埒于次卿先見彰于嚴媼公勘實無貲傳以重比至于
均田弭金谿之闕褒忠洗革除之枉正色已悍宗之擾
旁遺汰辜摧之濫如斯種種未易殫述公皦然白日致
崇翹翹丙戌中臺抨悉抵誣勿罔事銓部爲覆其奏若
曰坐柏舟以宣淫命伯夷以鈔盜反覆詳辯甚于慰積
卒難言者體議量調留都焉其所勿罔最著謂持掬鼎
入賂相君某乙酉行漕楚會暮憇安陸訪弇州之片石
撫欵籟之有耳爲之徘徊一响竹晷九嶷且昂乏雷文
色曠寒瓜直不四五千何以賂相君茲當執筆左證顯

然寔天以大賢畀予雪也公言返故閭閉門却掃遠慕
履于偃庭消驚咤于陳座監司守相械書閣而靡達部
使言臣薦剡殊不爲意南昌相趣以起家公乃置函而
不答獨以鄉人罹患若厥創鉅我土無歲大行收贖此
則發自淵衷不由矯飾者也公門儼朝典身自教兒平
生無雕鏤金玉之翫家庭靡謔浪跛倚之失以故名儒
箸膝駢翼凌舉禮部高素出群徵君孤清摩世太邛少
代差可倫比公晚遭末疾里中競相祠禱重及彌留寤
戚願以身代萬曆癸卯二月告終春秋七十有一悲士

禮部君暨弟聆音莫卽瞻顏弗覲援重譴于皇天付微
骸于后土糝糝靡所憧心不朽以爲刻楠之荒唐奚謂
擢穎之醇懿可尚戶詠家畫輝邦映族豈異人任誤託
于蒙某也欽風味道寧汶汶于前哲傳芳寫譽敢髦髦
于淺學庶幾素旂譟行厚夜靡幽太常稽勛旭旦恒鮮
云爾其辭曰鼻祊伯益支衍東海大賢一期五百應載
其人伊何天挺魁磊其出伊何世寶整鶴孤童依母訓
著三遷起家義易直上連韉牛刀試割日洵無全笨鈍
孝秀我黷我屢燕召端公淮驅驄馬心計牢盆圭璧被

野地回流錢公藐委光我■皇蹶然南向引竿興懷三
徑移疾巖隈蝨能爭卷人無破苔■帝咨孔亟公兮駕
駮大讞大議匪公孰哉三尺我持三公豈易一麾誰爲
東閣賓客欣然出守鄖公舊宅緬昔熟輕奏刀剗剗朝
正北走■帝坐明堂黃金獎異來襍去裝皇皇刺史萬
夫所望于荆之役圖勞弗償公久章華非大相指荏苒
七暮組繡糠粃大相幹奴戚黨鄰里不我抵振我不否
鄙治宮拓地闢人露嚙公曰尺土吾銜節符相君予急
執珪踵趨公曰禮云無庸拜途周歷總臺不離南紀我

官我家湘漢允喜擢長江藩出納校齒誰揆拊循乃于
公以相君當軸公恒積薪大星告隕公乃專茵下成蹊
者不聞斷斷升沉默定胡關望塵他撫示慈公則紀振
匪公狗威斤斧芒刃表忠弗連按酷無恡有王國人大
法小趁疇令愴輩連彼悍宗告書訛布囂俗龔攻留都
齟齬署旭爲春銓曹辯理播諸洪鍾量議移南公則止
坎進退枯榮超燕元覽門屏雜賓沼擢綻昔中宵念旃
野或不糝公庭弗踐朝客杜書當塗慰薦喧喧懸車古
有萬石今則填間古有擁笏今亦垂魚所可周爾文章

道德所可式矜績織稼穡白首齊眉重爵大國羗二老人弗見顏色公當始第痛惟母貞小嫵年限靡敢誦情同人汲汲意切丁丁公心不昧曰邦有程忠信可行三晨麗上仰不愧天俯不我喪天卒報公赫赫命貺父兮毋兮九地隨唱敢私公後勿忘公勤造化蘊積乃胎芸芸冰薄則陷日昃乃曛公沒遺囑有言無文嗚呼哀哉日月悠悠正衾在殯孝子剗心凡附必慎圓石方塋筮吉舉櫬僑謝纏悲人願身殉嗚呼哀哉哀榮生死于世良奢如雲門故服經制麻嘶風石獸蔽空林鴉若從情感共噉靈閣嗚呼哀哉名子聞孫衍恤掩闕四方來觀停軫立轡加餼賜阡倚遲遙蒞千秋有那視螭鼻負鸞嗚呼哀哉

新城大司徒王公誄

岱宗中峙重渤環焉是爲古先講業齊魯之區叶光鍾篤禮樂淳漸京夏咸莫與比倫其在我 明縕積充厚爰有至人具至心含至德備至行則新城王父以馬王父者贈大司徒見峯先生也先生累葉名德發祥匪令爲贈太僕公仲子少不好弄瞻視步履一如巨人家沿

卷之十七
簪紱力學食貧入塾則數掩衆稚在類則恒難多士踰
冠舉于鄉爲第七人是日歌鹿之筵懣懣心動箸欲下
而不能酒入喉而三咽詎意天親離屬精祲必先其先
太僕乃于是月捐舍貴陽也先生跣奔萬里勉以喪歸
尋舉壬戌進士拜楚荆之李官直道平刑開學得儔士
民胥服比當遼王汰彥不法先生悉發其奸借天之幸
未中螫毒以望詔授刑科給事中游歷禮刑二科都給
事中安民固本之疏 穆皇爲之肯領責實圖功之議
休采靡不縮舌迨夫出冊名藩則遠腆苞于若浼其心

疆貴則奮利劔以無貫披胸已興化之託正色折新鄭
之風倡言安華亭之枕持平啟德平之歎所謂敦大正
直深靖竝遠一時諫地號稱無兩者也用資得太僕少
卿未幾改鴻臚卿岳岳公望之夫屈爲太行之任畧無
動容已擢大理已晉南太僕已比太僕已順天府尹遲
回數歲周歷九列若近若遠若信若疑而先生秉節不
回隨分共職久之以副都御史撫熊繹馬先生矢天指
水峻厥仞屬疆王失拔刀之向橫士罹就舍之典遠邇
快心凡三年擢戶部右侍郎癸未轉左一代京營一督

倉場皆劇任云于時先生母劉太淑人春秋高矣懇疏乞省奉 旨予限才六月先生遂堅臥不出若將終身焉半菽眇三公之大象萊詭駮童之戲薦剗婁達厥耳如塞 朝命臨迫決死以辭先生視兄封公跋踏既貴躬蹈萬石帥諸弟子姪聯翩上酒太淑人前金紫銀青履綦相藉晝遲明而炫繡堂閱世以成綵先生俯然歛退懼其滿盈恒戒以無辱諷之不殆其家化之舊肆毛氏詩得其理解思欲傳之人人而口古編授先我一門兼致名世大師分座合肆載經寒暑晨鷄夜炮矻矻素

儒未一日告勞以故郗林非叢桂之一枝鄧氏引諸郎以並上如斯家督舉世所無也先生孝思絕人垂老無替感夢新忠勤之庶表德勒龜螭之告維桑與梓厥念鍾于樹槐見先于厝無改徵于圯舍瞻三族以炊羹連四境之衡降大布用以飾躬祝鳩緣以佐步安安大臣之節藹藹吉人之風曾何知夫冢公膺御史大夫之尊諸子極郎署甲科之選乎先生書示西蜀謂兒幸無相念我齒尚堪礪石我目尚堪察蚤以故冢公安意治軍消其紛議保有三垂守道守官屹然長城之固視帷視

膳無須兒女之暱先生之日可以瞑矣先生晚涉養生
家言飲啖臥起俱有常兼所著書悉以牖善導愚陰騭
報施爲主本居平嚴勅子弟涖官坻鮮以上比于盜賊
懍懍訓言毛髮爲指端凝庶儉此豈有死道而天年終
此則管公明之數理誠有之先生得壽七十有八平生
所霑句 朝廷譽命恩更僕不可數計聞贈爲戶部尚
書禮工二部所擬地上地下典一切優于恒叙云某廁
在世牒復連姻籍而先生素與先侍御公講德砥名是
稱夙好旒旒之後誰則任之至人至心至德至行光光

由夏詎第重渤岱宗間某因抒哀作誄以廣聽觀言辭
弗斐非所計也誄曰瑯琊發源桓臺濬流曰維太僕爰
抗前騶篤生名世廟璉天球肅離在列疇足與儔位在
上臣行則儒素迹厥有生諦矚詳步筮仕司刑以逮言
路狗職守官不如不吐周迴列寺京尹是憑狹斜晚貴
就其規繩出開楚甸馬奮車軫吏無骹法堵安可徵羗
彼司農借公來佐右之左之以視成課嚙指動心臣謝
八座有毋之殮間黨相賀公捐簪組手把犁鋤校陰量
晴祝禾盈車爰咨慈氏父詞載隸鍊泥運甓赫然寧居

我有遺書以詒孫子庶其賢科勿狃胷齒我無黃金以
侈鄉里庶其不爭允妥管臬九卿之父九卿之身敝易
几几我族我鄰忠臣之子忠臣之親丹情翬翬其間其
恣開八之齡塔焉觀化木壞哲萎傳盡京夏如假所歸
猶晝卽夜黃腸奏題斯是永舍嗚呼哀哉維 帝之眷
優渥無倫顧彼三官交申溫綸司徒正位皇餽孔陳旣
穿復土天光燭銀嗚呼哀哉子姪皇皇昊蒼曷置生順
沒寧俾昌俾熾自有塵寰自有人事展如我公萬古不
墜嗚呼哀哉

陳母嚴太恭人誄

嚴太恭人者吾友陳廣野母也廣野自成進士卽弟齋
余逮後爲理官爲諫議兩人聲跡相頡頏以故兩家尊
人亦互相起居修樽下之禮一如其家人禮客歲庚寅
春廣野由吏垣首諫積資拜容臺少卿司鞮譯事隸在
翰林稱清貴矣而母適滿八十歲期廣野請急擬歸上
卮酒而介弟郎中君亦于時拜秩爲南昌二千石會且
治裝行亡何以訃報嗟嗟天胡不少延母而令二大夫
割心崩稽爲余走馬爲吊廣野廣川之潯廣野沈瀾而

請曰孤至不肖辱不鄙夷而兄視之先夫人儻亦猶母也其一言哀之余誼不獲辭乃詢葬期爰束帛炙鷄屬家童裹糧往告焉佐以誄辭文不文何暇計哉誄曰婺宿麗天瑞采網緼遙臨滄江鬱爲穀文洪波巨芒鍾乃母身深山大澤馮之者神天非夢夢理豈汶汶宜爾子孫駢駢振振維何兩席上珍伯冠春官仲躡華紳諫官郎署咄咄要津版輿婁駕逐母海瀕母曰長安不如此隣我身差健不廢縫紉香杭碧荇其樂何垠象服玉珈褚而流塵庶哉黃壤以謝隱淪庚寅之歲壽八十

春伯陟清卿仲拜守臣精金燦然腰章亞鱗連軛南還幾母一嘖書先白毋毋坐重茵召乃叔季以逮諸荀我故妹妹今穰太君我故儒門今列雙轡福祚已極揆厥本源爾考爾祖播種實繁嗚呼哀哉鬱葱賀色詎爾告堙一夕之疾溘焉謝餐爰侍奏柏爰庀禭巾家雖不富歛乃不貧嗚呼哀哉廬兒比走凶問連旬天崩地沸兄號弟辛難必者天不待者人一雙椹衫易爲麻緡夜夢何祥仍上重闈相率拜毋解帶行醇俄而夢覺苦塊獨蹲肚裏淚下痛劇呼旻狂奔抵舍攀棺若新五內俱裂

視息僅存嗚呼哀哉占星問卦支卯干辛歲年月日元
吉其旋載揚丹旄載指靈輪萬年華表奠此窆窀嗚呼
哀哉某與伯氏若一軀分同心之契如莊斯稟結言拜
母每媿范君終天已矣望醑如焚嗚呼哀哉萬石嚴嫗
賢知聲聞千秋東海懿烈並芬嗚呼哀哉太邛作配元
季雙鶯猗歟母兮獨秀榮萱忘憂衍衍代茁芳蓀長文
孝先視此後昆

東郡大方伯吳公誄

夫賢者云歿嘒噫寄于宿老旒旒頌德哀輓託諸睿匠

是以仲尼興泣于鄭產伯牙輟響于子期中郎載筆于
有道延之極思于徵士良以知己誠難則綴詞不易在
公動盡則流美匪私以斯證之我方伯公不亦古今一
轍異代無爽者歟方伯公姓吳氏名道昇字名輔東郡
聊城人也延陵布葉弗滯乎札鄉晉安移柯允卜于箭
里祿仔而降代禮義聞英文錫俠二祖尤烈迨處士江
含醇蹈和州壤向化公其子焉公靈稟溟岳體周陰陽
厥有度索踐夢爰始覽揆少肄毛氏詩屬撰竒敏里歸
聖童及隸弟子員屢試卓冠于人自廢比安成鄒公以

累代淵源爲東人師廷入內署共諸郎學一時奕奕名
振曹耦而值 先帝踐阼詔拔異等公以片玉遂登是
科六館下郭泰之儔異環橋欽陽城之賞識某以髫歲
亦獲與焉公連第進士筮仕李官三輔雄繫之舊西京
風物之美公精心棘聽間亦樹人尋丁母胥夫人憂滿
制補鎮江斤成風于往斲鏡徹膽于伏魅于時雲間軟
長假守于公禽逸著警捷之譽品士收藻雅之號四郡
盡傾矣屬當公車有召牘簡借前而公考厭世故里倉
卒奔歸連君之苦塊幾毀汲直之禁闥遂邈蒲制比首

夙望益隆乃以不阿大相僅得刑部主事焉彼詠堙梧
者誰歟此拜雲司者顛哉官以拙而名愈劭曹用閒而
職彌厲後宰善之猶以前侂失青瑣欲改置銀臺門公
匿不應選堅守故秩尋啣恤命復之關中雅有意于縱
畢畧無心于搦秦虞祖何覲于九卿世軌殊當于二絕
事竣報最稍遷郎中大司寇李公一世人倫倚公爲重
訊讞大小悉以相屬挺身發干振之譎盛氣折威晚之
恣曾不日西曹地忍之卽丞相無如予何也時公計資
八載數擬叅藩竟以默默才轉陝西副使理涇邠爾當

西寧告變勢誠岌岌近甸戒嚴而公繕甲訓卒目不交
睫四塞之地藉公長城及攝學校識拔失職寒士吳岐
旋奏鄉書第一伯樂所至幾無留良此固政術之餘緒
而章縫士顛吐氣實多矣分陝甫二載以前刑曹資亟
拜參政仍兼憲職治叙馬瀘兼治蒙撒諸區地交夷漢
三方萬里未提不足仰活掇旗嘆于自衛夔侯非化導
之素捷爲乃用鉞之藪而公宣威飭令推誠布公如警
貪濫如清驛傳如革木夫如厲盜禁如法罔舉人如逮
橫通刊皆剪薙姦蠹不令賊人而又行荒恤歎傾帑發

周迨我秀民置田求贍鳩僇素王之宮表正蠻獠之俗
班班厝注沔以不刊播州之役今大司馬邢公奉命
經畧公代錄川東佐理軍事先聲所被醜虜乞降未煩
一鏃坐銷萬甲在公攻心上策秘未盡聞而司馬公意
肅形服表公才畧賜金勞慰世所共知者也及于三載
兩臺以功狀聞隨晉四川按察使勅領清軍驛傳屯田
鹽茶水利諸務公由裔土監司入省蒞事風采動于全
蜀官方貞于八面曾未逾月大寮小吏帥臣士伍凜如
也尋總藩篆人目爲金穴公以公綽之無欲行隱之之

軟水出乃視入無少低昂藩府諸王交口申頌御枝歡
鼓所不論矣未幾賫捧入■賀還以臬長監試蜀棘闈
御史津津歎肅給馬已復以臬長入計吏評騭可否畢
照肝膽公論所在絕無依違部院遺廉大吏以卓異上
公居其首兼之長安滅賄賂之跡屬員楊東脩之薦清
風足表朝覈失嚴者矣公由■闕下蹇返閭社山公之
啓事寤偏越藩之右丞爰及一麾間其未抗二豎儵焉
見侮裴相午橋之莊虛其軟碧杜公丙穴之吟魯其晉
想此士修等仰天長號實身莫贖者也嗚呼哀哉公百

行且足六合等視卮子分宅于疏屬杜誠示悲于同氣
潘楊篤其姻睦班尹洽其朋眷若夫矢口成韻宮商朱
紫洪流浩浩動見紀述此又餘事詩人踔絕國士矣公
正命以戊戌八月得壽六十有二年不配德位未三事
縉紳慟焉有子二人士修士偉雙珠宛其照乘于門佇
其再大人理爾爾厥應俟旃公凡三考三奉 璽書最
後溯窮二代爰逮厥躬閨閣後先掄狄駢耀公于塵世
可無憾矣某誼深杵臼情均死生謫厥懿行豈伊異人
乃作誄曰延陵衍派溫陵揚潤爰居爰止聊城孔安積

德累葉靈鍾穴丹五文五采鳳矯其翰夫子登途試理
三輔家難中罹起倅江土馳驅吳會政譽清臚大喪再
丁無父何怙及年終制趨召公車失驩當軸來主刑書
白雲司近白雪人踈俯仰一代感慨淪胥坐曹平反援
經證律三尺如山其大相詰出布王仁俯躬恤恤苟得
其生張我丹筆一麾司憲復在秦關駢駢角弓向西而
轡尋叅蜀政轄彼熨蠻章縫奕奕文其媮媮尋正臬司
縮厥六轡曾弗告勞君子不噐藩長偶虛借公赤幟朱
提千姿不邇于臚負時雅望擢越右丞徘徊閭非二豎

見陵爲善必報斯言可憑云何實喪天胡萑萑嗚呼哀
哉夫子之身備其四氣夫子之才兼總萬彙自昔韜光
蘄保我貴不逐塵氛厭迺世味文犀匪耀鶴繡非華坐
進此道天爵無加型模損遠祝史滿家誰能起公易茲
竒哀嗚呼哀哉久厝殯宮堪輿失題惟地啓文若旱逢
歲月吉時良即此穿窬孝子至心爰表世世嗚呼哀哉
封禮部右侍郎兼翰林院侍讀學士青州仰芹馮

公誄

萬曆二十四年八月十八日封禮部右侍郎兼翰林院

侍讀學士北海仰芹馮公卒于正寢得壽五十有八嗚呼哀哉維公累葉名德南宮起家敷歷中外致官叅知可稱謂貴決機明哲未老懸車疏傳不遙鹿門再覲可稱謂達二豎道及咄嗟寢疾厥嗣宗伯請急郵歸齧臂示痛年命若留拜床嘗樂子舍三夕天幸一也覃厥封章秩宗學士宗作手誥逮公殯殍伏枕憑茵主臣叩首亟呼掌記刺達王家天幸二也臣情子職倉皇奏書穹封異恩獲焉若掇居墳請卹視內三品以祭以葬問等有加天幸三也抃志有之身沒名垂是爲不朽孺子通

家託公敢副旒旒恭作誄焉誄曰炎漢之季繼踵因循馮氏之世衣履綿緝黃河萬里汎濫三津亦有北海浩淼漣淪極遼冽水衍派維新以委以源盡鍾哲人惟公挺生大行爲父母媿父外父死兒乳彼蒼不仁降割旁午人勝劣天視此當戶當戶慧中不教伊怒鈇擣九流踔厲終古年垂挽髮文府馳聲四蹄電戒萬馬避行旣登天路沫血悲鳴小臣有母單孀合旌煌煌天鑒錄此女貞臣可以仕牧茲甸氓奏績維時量移駕部旋歷職方尋膺晉斧載泣雲中民歌士舞虜來問弓公曰予侮

二枯連集虜遂頰首公笑頷云予氣差吐讒入肆虐公
宜就卑于時宗伯金馬厪屨人謂而公必復之騎公曰
君曹道固委蛇小人有毋久曠庭帷我其歸歟耳旨諸
居衆實急公和州嚆矢強弩加遺爰被秦璽持梟修兵
關羊不芊以何因緣第借馬箠曠早無年步零穎泚塞
人不亡公降之水晉梁洊陟移節易州天都要害唯公
是求民訛吹煽謂髡此邛公但轟飲人言行休此興礦
議公曰吾謀名雖金穴實尋盜矛日今攘攘伐山四陬
安得若人爲遏張壽勞極資深分藩洛下一日抽身還

我榆社公旣穢羸宗伯賜假父倡子賡復游臘夏王程
不留宗伯炙輶子孝臣忠公顏如赭詎期二豎忽忽相
攻宗伯於朝憂心忡忡尺疏朝聞巾車夕東疾置以覲
公神尚聰侍藥三日遺言薄嚙臥而拜命無幾告終嗚
呼哀哉公負賞評羅羅清燕片善在人推轂必先公惟
喜施不遺簡賤石卧縑幘恒首知眷公體含和顛條風
扇遇乃僻邪立折以面公愛徜徉慶每會拊一絃錫衰
畫馬損膳嗚呼哀哉旁耽博藝打馬行棊雙楫斗酒鼓
吹黃鸝才凌班左技擅繇義窟醉染造神來氣隨迴翔

廿載軟泉是師自公而他楊邁朱提鄉多後彥斯焉取
斯自公其捐疇館疇緇嗚呼哀哉公身所遭人倫會極
身公所行而報斯食溱溱萬顛陂曲平直悠悠兩間公
乃多得公壽弗延若日嚮久太完微鐫余量以臆嗚呼
哀哉

來禽館集卷之十七

